

Sþ.

267. Tillaga til þingsályktunar

um flutning hengibrúar.

Flm.: Bjarni Ásgeirsson, Pétur Ottesen.

Alþingi ályktar að heimila ríkisstjórninni að láta flytja gömlu hengibrúna á Ölfusá hjá Selfossi og setja hana niður á fyrirhugað brúarstæði á Hvítá í Borgarfirði hjá Bjarnastöðum í Hvítársíðu, enda verði unnt að gera brúna svo úr garði að dómi sérfróðra manna, að hún komi að fullum notum til frambúðar á þessum stað. Kostnaðurinn greiðist úr ríkissjóði.

Greinargerð.

Brúarbygging hefur nú fyrir nokkru verið ákveðin samkvæmt brúalögum á ofanverða Hvítá í Borgarfirði hjá Bjarnastöðum í Hvítársíðu. Er að allra áliti, er til þekkja, hin mesta nauðsyn á að hraða þeirri framkvæmd, en með henni yrðu tengdar saman í eitt flutninga- og samgangnakerfi nokkrar af uppsveitum þessa frjósama héraðs beggja megin árinna. Yrði að því mikil hagræði, einkum vegna mjólkurflutninganna, sem nú eru þarna mjög örðugir yfir vetrarmánuðina, einkum vegna þess, hve án er mikill þróskuldur fyrir samgöngum og samstarfi í þeim efnum á milli sveita. En mjólkurframleiðsla og mjólkursala hefur farið þar mjög í vöxt á síðari árum.

Par sem nú er langt komið byggingu hinnar nýju Ölfusárbrúar, svo að hin eldri mun verða tekin úr notkun á næsta ári, virðist sjálfsagt að ráðstafa henni nú þegar til notkunar, þar sem vissa er fyrir, að hún geti komið að fullum notum. Og þó að hún væri ekki lengur fullnægjandi til samgangna á Ölfusá, eru fyllstu likur til, að hægt væri að gera hana nothæfa þar, sem um minni samgöngur er að ræða, ef hún væri styrkt og endurbætt samkvæmt fyrirsögn verkfræðinga. Væri og sjálfsagt, að fram væri látin fara nákvæm athugun á öryggi hennar, áður en hún yrði sett niður að nýju. Við, sem flytjum þessa þingsályktunartillögu, vildum stuðla að því að flýta fyrir brúarbyggingu þeirri, sem að framan er getið, ef unnt teldist að dómi sérfróðra manna að leysa málið á framangreindan hátt, og ef ekki er talið, að hægt verði þegar á næsta eða næstu árum að byggja þarna nýja brú.